

Aruba merece miho

Skirbi pa: Clyde R. Harms Sr.



NA Februari 2013 mi articulo “*E saga di renoba plachi di number tur aña*” a muestra con costoso e cambio di plachi ta pa nos comunidad. Pa algun aña DIMP a stop e rekisito aki pero pa aña 2025 DIMP a dicidi di trece bek. Pa no perde tempo, dia 8 di Januari mi a paga 24 florin p’e plachi y 300 florin pa henter aña p’e number. Mi a compronde cu DIMP lo manda e plachi per post, pero esey tabata un fout. Mi mes mester bin busk’e. Como mi ta un invalido cu ta uza un rolator mi a kere cu ami lo por pasa padilanti di e rij. No, e rij ta solamente p’esnan cu mester paga. Pa haci cita, mester yama pa telefon.

Awe mi a purba haci un cita. Despues di warda mas di 30 minuut, si, mas di mei ora, na telefon y ningun hende a contesta’mi mi ta puntra mi mes si DIMP sa kico e ta haci. Comunidad di Aruba mester perde masha hopi tempo p’e plachi nobo. Mi ta spera cu DIMP lo deshaci di e rekisito aki pa semper cuminsando cu aña 2026. Aruba merece miho.

Setenta aña pasa

Sonora Matancera cu Celia Cruz a bin Aruba y Aruba a namora di Celia

WINKEL Handel Mij. maneha pa Oslin Scholten a patronisa un fiesta na Caribe Club cu Sonora Matancera y Celia Cruz. Aruba a namora di Celia. Den tur skina di Aruba tabata papia di Celia. Entre e miembronan di Club Caribe por mira Oscar Hart bailando cu su ruman Igma, Rimbert Arends cu Geraldine Oduber, Sid Frigerio cu Fanny Oduber, Shorombo y Noonchi Harms. Tambe por reconoce Gilbert Arends, Joy Habibe, Donny Oduber pero no nan partner. Tambe por mira Robbie Kemmink, Ildo Ponson y Roy Frigerio.

Clyde R. Harms Sr.

